

---

## Кичик саноат зонасида фойдаланишга топширилган янги корхонада сифатли ва ҳамёнбоп мебель маҳсулотлари ишлаб чиқарилмоқда

Учкўприк туманидаги “Тожики” кичик саноат зонасида “Шукрона мебель файз” мебель маҳсулотлари ишлаб чиқариш корхонаси ўз фаолиятини бошлади.

Янги корхона фойдаланишга топширилиши муносабати билан ташкилланган тадбирда туман ҳокими Абдоржон Асқаров, ҳоким ўринбосарлари, ижтимоий соҳа муассасалари раҳбарлари, нурунийлар иштирок этди.

Туман ҳокими тадбиркорликни ривожлантириш, янги иш ўринлари яратиш ва аҳоли фаровонлигини оширишда кичик саноат зоналари алоҳида аҳамиятга эга эканлигини таъкидлади. Қайд этилишича, туманда ёшлар иштирокидаги тадбиркорлик субъектларини ташкил этиш, янги иш ўринлари яратиш, саноат маҳсулотлари тури ва ҳажмини кўпайтириш мақсадида “Тожики” маҳалла фуқаролар йиғини ҳудудида бўш турган 15 гектар ер майдонида кичик саноат зонаси ташкил этилиб, тадбиркорларнинг истиқболли лойиҳалари жойлаштирилмоқда.

Мазкур кичик саноат зонасида қарийб 109 миллиард сўмлик 50 та лойиҳа амалиётга тадбиқ этилмоқда. Мазкур лойиҳаларни амалга ошириш натижасида 1 минг 200 дан зиёд янги иш ўрни яратилади.

Бугун фойдаланишга топширилган янги корхонада ҳам 10 нафар ёшларнинг бандлиги таъминланди. Хитойдан келтирилган замонавий ускуналар билан жиҳозланган корхонада бир ойда ўртача 500 миллион сўмлик 100 турга яқин сифатли ва ҳамёнбоп мебель маҳсулотлари тайёрланмоқда.

Мактабгача таълим ташкилотлари, мактаблар, тиббиёт муассасалари, офисларни жиҳозлаш учун мўлжалланган мебеллар тўпламлари, ўқув анжомлари, эшик-ромлар, меҳмонхона ва ошхона жиҳозлари туманда қурилаётган кўп қаватли уйлар, ижтимоий соҳа объектлари ва аҳоли хонадонларига етказиб берилмоқда.

2023-05-08 14:58:35